



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

DREJTORIA PËR TË DREJTËN E INFORMIMIT

Nr. 1378 / Prot.
2

Tiranë, më 7 / 11 / 2017

VENDIM

Nr. 95, datë 7 / 11 / 2017

PËR

URDHËRIMIN E AUTORITETIT PUBLIK

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 “Për të drejtën e informimit”, shkronjës a) të nenit 31/1 të ligjit nr. 9887 datë 10.03.2008 “Për mbrojtjen e të dhënave personale” i ndryshuar, Komisioneri për të Drejtën e Informimit dhe Mbrojtjen e të Dhënave Personale,

V Ë R E N:

Ankuesi, Znj. _____, ka depozituar pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim quajtur “Komisioneri”) ankimin nr. 1378 Prot., datë 18.10.2017, kundër Autoritetit Publik “Ministritë së Shëndetësisë dhe Mbrojtjes Sociale” (në vijim quajtur “Autoriteti Publik”), me objekt “Ankim ndaj refuzimit për dhënie informacioni dhe kopje të dokumenteve zyrtare”.

Ankuesi ka depozituar pranë Autoritetit Publik kërkesën për informim me objekt si më poshtë:

- *Informacion të detajuar (rregulla, vkm, ligj), në lidhje me procedurën që duhet të ndiqet nga institucioni për klasifikimin e sëmundjes Dg. Fibromialagjia mbështetur në sistemin ICD 10, si dhe aplikimi i saj në Shqipëri;*
- *Kopje të kërkesës, raportit apo dokumente të tjera sqaruese të paraqitura pranë Komisionit të Nomenklaturës së Kodifikimit të Diagnozave dhe procedurave Mjekësore, organ pranë INSTAT, bazuar në shkresën kthim përgjigje nr. 2835/1 Prot., datë 13.06.2017, drejtuar Avokatit të Popullit.*

Ankuesi pretendon se është cenuar në të drejtën për informim, pasi nuk është informuar lidhur me sa ka kërkuar dhe për këtë arsye ka paraqitur ankim pranë zyrës së Komisionerit.

Nga dokumentacioni bashkëlidhur ankesës rezulton se Autoriteti Publik nuk i ka kthyer përgjigje kërkuases.

Pas refuzimit të dhënies së informacionit nga Autoriteti Publik, ankuesi kërkon nga KDIMDP, ushtrimin e kompetencave që i njeh ligji për rastet e refuzimit të dhënies së informacionit si dhe urdhërimin e dhënies së informacionit/dokumentacionit nga autoriteti publik.

Me shkresën nr. 1378/1 datë 27.10.2017, Komisioneri ka kërkuar të trajtohet kërkesa dhe të vlerësohet dhënia e informacionit të kërkuar brenda datës 02.11.2017. Megjithëse ka kaluar afati përcaktuar për dhënien e informacionit, Autoriteti Publik nuk ka kthyer përgjigje.

Pas shqyrtimit të ankesës, kërkesës për parashtrime, si dhe konsultimit të legjislacionit përkatës rezulton se, informacioni i kërkuar përmbush kërkesat e pikës 2, të nenit 2, të Ligjit nr. 119/2014 “Për të drejtën e informimit”, i cili përcakton se: “Informacion publik” konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik”.

Autoriteti Publik nuk ka përmbushur detyrimet e përcaktuara në nenin 15 të Ligjit nr.119/2014 “Për të drejtën e informimit” (në vijim quajtur “Ligji për të Drejtën e Informimit”). Bazuar në nenin 15 të Ligjit Për të Drejtën e Informimit, Autoriteti Publik trajton kërkesën për informim, duke parashtruar informacionin e kërkuar sa më shpejt që të jetë e mundur, por jo më vonë se 10 ditë pune nga dita e dorëzimit të saj, përveç rasteve kur ligji i posaçëm parashikon ndryshe.

Bazuar në pikën 3 të nenit 3 të ligjit sipërcituar, “Çdo person ka të drejtë të njihet me informacionin publik, nëpërmjet dokumentit origjinal ose duke marrë një kopje të tij në formën ose formatin që mundëson akses të plotë në përmbajtjen e dokumentacionit”.

Bazuar në pikën 1 të nenit 14 të po këtij ligji parashikohet se “Të gjitha kërkesat për informacion trajtohen, si rregull, nëpërmjet konsultimit pa pagesë të informacionit në mjediset e autoritetit publik, apo, kur është rasti, nëpërmjet faqes zyrtare të autoritetit publik në internet”.

Për sa më sipër konstatohet se Autoriteti Publik nuk e ka përmbushur detyrimin për të informuar kërkuases.

Theksojmë, se e drejta për t'u informuar është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funksionimi i tyre do të ishte në interesin e të dy palëve.

Në këto kushte, në lidhje me ankesën e Znj. _____ ndaj Autoritetit Publik Ministrisë së Shëndetësisë dhe Mbrojtjes Sociale, Komisioneri vlerëson se ankesa është e bazuar në ligj dhe si e tillë ajo duhet pranuar.

PËR KËTO ARSYE

Bazuar në shkronjat b) dhe ç) të pikës 5, të nenit 24, nenit 25, të ligjit nr. 119/2014 "Për të drejtën e informimit", shkronjën a) të pikës 1 të nenit 18, të ligjit nr. 49/2012, "Për organizimin dhe funksionimin e gjykatave administrative", dhe gjykimin e mosmarrëveshjeve administrative.

V E N D O S A:

1. Pranimin e ankesës së Znj. _____ me nr. 1378 Prot., datë 18.10.2017, ndaj Autoritetit Publik, Ministrisë së Shëndetësisë dhe Mbrojtjes Sociale, me objekt "Ankim ndaj refuzimit për dhënie informacioni dhe kopje të dokumenteve zyrtare".
2. Urdhërimin e Autoritetit Publik, Ministria e Shëndetësisë dhe Mbrojtjes Sociale, për vënien në dispozicion të informacionit të kërkuar, konkretisht:
 - Informacion të detajuar (rregulla vkm, ligj), në lidhje me procedurën që duhet të ndiqet nga institucioni për klasifikimin e sëmundjes Dg. Fibromialgja mbështetur në sistemin ICD 10, si dhe aplikimi i saj në Shqipëri;
 - Kopje të kërkesës, raportit apo dokumente të tjera sqaruese të paraqitura pranë Komisionit të Nomenklaturës së Kodifikimit të Diagnozave dhe procedurave Mjekësore, organ pranë INSTAT, bazuar në shkresën kthim përgjigje nr. 2835/I Prot., datë 13.06.2017, drejtuar Avokatit të Popullit, brenda datës 14 . 11 .2017.
3. Kundër këtij vendimi palët kanë të drejtën e ankimit në Gjykatën Administrative Tiranë, brenda 45 ditëve nga marrja dijeni e këtij vendimi.
4. Ky vendim u dha sot me datë 7 . 11 .2017.

